

e cuideachd 'na Cheann-suidhe air Bòrd na Coille an Albainn. 'S e an Gaidheal eile tha air, Iain MacNeachdainn as an Oban.

DONNCHADH—Earraghaidhealach, huh!

MAIGHISTIR-SGOILE—Seadh, Earraghaidhealach, ach deagh fhear-dùthcha a dh'aindeoin sin. Chan eil fhios cia meud seòrsa oibre is seirbhis anns a bheil Iain còir an sàs a chum leas an t-sluaigh. Is esan Ceann-suidhe Comhairle an Fhoghlaim an Earraghaidhealach, agus Iar-Cheann-suidhe Comhairle na Siorrachd, agus Ceann-suidhe Riaghlair-ean Urras NicCaoig, agus Ionmhasair baile an Obain, agus rud no dha eile! Cuin a tha ùine aige a bheòshlaint a chosnadh—tha e an seirbhis nan rathaidean-iarainn—chan aithne dhomh!

DOMHNALL—Duine dèanadach, agus b' e sin esan! Is geal a choisinn e urram an C.B.E. a fhuair e aig a' bhliadhna-ùir so chaidh. Ach cumaidh oirbh, a mhaighistir. Cò tuilleadh a tha air a' Choimision?

MAIGHISTIR-SGOILE—Tha feadhainn air nach eil thusa no mise eòlach. Daoine comasach, gun teagamh, agus dithis bhoireannach 'nam measg.

DONNCHADH—Sin agad! Mo ghaladhadan! Agus nach eil Morair Chat air a' Choimision cuideachd? Shaoil leam gum faca mi iomradh air-san anns a' phaipear.

MAIGHISTIR-SGOILE—'S e am Morair *Catto* air a bheil sibh a' smaoineachadh. Fear eile a tha sin! Chan e an Sutharlanach mór idir, ach uasal eile a bha uair-eigin 'na phrìomh-riaghlair air Banca Shasainn.

DONNCHADH—Am balach e! Tha fhios gu bheil esan math air na cùntasan, agus rud aige ri chùntas cuideachd! Agus a bheil esan air a' Choimision mhór so?

MAIGHISTIR-SGOILE—O, chan eil. 'S ann mar so a tha. O chionn dà bhliadhna chuir an Riaghaltas air chois comhairle-rannsachaidh, leis a' Mhorair *Catto* mar cheann-suidhe. Bha aca so ri rannsachadh a bheil dòigh air faotainn a mach ciod a' phàirt de thighinn-a-stigh is de chosgais na rioghachd gu h-iomlan aig a bheil buntainneas ri Albainn; agus ciod a' phàirt de luach malairt Bhreatainn a bhuineas do Albainn.

DONNCHADH—Car son air an talamh a bha iad air son a leithid sin fhaighinn a mach?

MAIGHISTIR-SGOILE—Bha a chionn so. Tha feadhainn ag ràdh nach eil an Albainn ach dùthaich bhochd, agus, nan robh i air a dealachadh bho Shasann—'s e sin, a thaobh riaghlaidh—nach rachadh aice air a cosgais fhéin a phàidheadh. Tha feadhainn eile a cheart cho làidir de'n bheachd gu bheil Alba a' pàidheadh a mach mórán a bharrachd air na tha i a' faotainn air ais, araon ann an cùisean-riaghlaidh agus ann an cùisean-malairt. Cò dhiùbh sin a tha ceart no có—.

DOMHNALL—Innsidh mise sin dhuibh. Tha fhios aig an t-saoghal gu bheil Alba air a creach aig na Sasannaich. Seall fhéin na tha Alba ag reic de chrodh is chaoraich is chloimh, uisge-beatha is iarann, iasg is gual, agus caob math de chumhachd an dealain a' dol mu dheas cuideachd. Agus gu dé th'againn air a shon? Tighean falamh is croitean fàs! Càit a bheil an t-airgead a' dol? Tha gu sporan mór nan—.